



CONVENIO DE COOPERACIÓN EDUCATIVA ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E A UNIVERSIDADE DE SANTIAGO DE COMPOSTELA PARA A UTILIZACIÓN DAS BIBLIOTECAS DA USC POR PARTE DO ALUMNADO DO BACHARELATO INTERNACIONAL DOS CENTROS DEPENDENTES DA CONSELLERÍA.

Santiago de Compostela, 28 de novembro de 2017

REUNIDOS

Dunha parte, D. _____, conselleiro de Cultura, Educación e Ordenación Universitaria (en diante, a Consellería), que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, de acordo co seu nomeamento polo Decreto 148/2016, do 13 de novembro, e no uso das atribucións que lle confire o Decreto 4/2013, do 10 de xaneiro, polo que se establece a estrutura orgánica da Consellería.

Doutra, D. _____, reitor magnífico da Universidade de Santiago de Compostela (en diante, USC), que actúa en nome e representación dela en virtude do Decreto 62/2014, do 28 de maio (DOG 4/06/2014), do seu nomeamento, e polas facultades conferidas pola Lei orgánica 6/2001, do 21 de decembro, de universidades, modificada pola Lei orgánica 4/2007, do 12 de abril, e polo Decreto 14/2014, do 30 de xaneiro, polo que se aproban os estatutos da USC.



As partes recoñécense reciprocamente, no carácter con que interveñen, plena capacidade xurídica para a sinatura deste convenio e, para tal efecto,

EXPOÑEN

I. Que o Estatuto de Autonomía de Galicia, na redacción dada pola Lei orgánica 1/1981, do 6 de abril, no seu artigo 31 atribúelle á Comunidade Autónoma de Galicia a competencia plena da regulación e administración do ensino en toda a súa extensión, niveis e graos, modalidades e especialidades.

Ademais, mediante o Real decreto 1763/1982, traspásanse á Comunidade Autónoma de Galicia as funcións e servizos da Administración do Estado en materia de ensino non universitario.

II. No ámbito da Administración autonómica de Galicia, a Consellería é o departamento que ten atribuídas, entre outras, as competencias e funcións en materia de xestión dos centros de ensino público de educación secundaria situados na Comunidade Autónoma de Galicia.

III. Dentro dos centros que son titularidade da Administración da Comunidade Autónoma de Galicia algúns deles imparten o Bacharelato Internacional. Dentro desta modalidade de bacharelato o alumnado debe realizar, como un dos compoñentes troncais do Programa do Diploma (PD) do Bacharelato Internacional (IB), unha monografía inédita. Trátase dun traballo de investigación independente e dirixido polo propio alumnado, que culmina cun ensaio de 4.000 palabras.

A Monografía constitúe:

Unha preparación práctica para os traballos de investigación universitarios así como unha oportunidade para que o alumnado investigue un tema que lles



interese especialmente e que estea relacionado cunha das seis materias do PD que estean cursando

Mediante o proceso de investigación para a monografía, o alumnado desenvolve habilidades para formular unha pregunta de investigación apropiada; levar a cabo unha exploración persoal do tema; comunicar ideas, e, por último, desenvolver un argumento.

IV. A USC dispón de bibliotecas, fundamentalmente a Biblioteca Xeral de Santiago de Compostela, que ten libros e material de traballo que lle pode ser de grande utilidade ao alumnado desta modalidade de bacharelato para a realización de indicada monografía.

V. Que é de interese para as dúas institucións colaborar para que o alumnado do Bacharelato Internacional dos centros dependentes da Consellería teñan facilidades para a realización de traballos de calidade que deben realizar, accedendo ás bibliotecas da USC.

Consecuentemente con todo o indicado, a Consellería e a USC manifestan a súa vontade de asinar un convenio de cooperación educativa para a realización das indicadas actividades, de acordo coas seguintes

CLÁUSULAS

Primeira. Obxecto

Este convenio ten por obxecto que o alumnado do Bacharelato Internacional dos centros públicos dependentes da Consellería poida acceder ás bibliotecas dependentes da USC, co fin de realizar a monografía establecida nesta modalidade de bacharelato ao rematar o segundo ano de formación.



Segunda. Obrigas da USC

Mediante a sinatura deste convenio, a USC comprométese a realizar a seguinte actuación:

- Facilitar o acceso, mediante a expedición do correspondente carnet, de todo o alumnado dos centros que imparten o Bacharelato Internacional ás bibliotecas dependentes dela, para que poidan recabar datos para a elaboración da preceptiva monografía que deben realizar ao rematar o segundo ano desta modalidade de bacharelato.

Terceira. Obrigas da Consellería

Pola súa parte, a Consellería comprométese a realizar as seguintes actuacións:

- Facilitar, ao inicio de cada curso académico, unha certificación expedida polos respectivos centros que imparten o Bacharelato Internacional coa relación do alumnado matriculado nesta modalidade de Bacharelato que poden solicitar o carnet para acceder ás bibliotecas dependentes da USC.
- Velar por que o alumnado dependente dos seus centros respecte escrupulosamente toda a normativa interna da bibliotecas ás que accedan (horarios, condicións de préstamos de libros, etc).

Cuarta. Rexistro de convenios

A sinatura deste convenio suporá o consentimento expreso da/s parte/s asinante/s deste convenio á Administración para incluír e facer públicos os datos referidos ao convenio, de conformidade coa Lei 1/2016, do 18 de xaneiro, de transparencia e bo goberno, e co Decreto 126/2006, do 20 de xullo, polo que se regula o rexistro de convenios da Xunta de Galicia.



Quinta. Vixencia

Este convenio entrará en vigor o día seguinte da súa sinatura e terá vixencia ata o día de finalización do curso 2017/18, e será prorrogado automaticamente por cursos académicos sucesivos, cos límites establecidos no artigo 49 h) da Lei 40/2015, do 1 de outubro, de réxime xurídico do sector público, salvo denuncia expresa dunha das partes asinante cunha notificación á outra con dous meses de antelación.

Sexta. Comisión de coordinación, seguimento e avaliación

Coa finalidade de asegurar o cumprimento deste convenio, crearase unha comisión de coordinación, seguimento e avaliación composta por dous/dúas representantes de cada unha das partes asinantes, coa seguinte composición:

Por parte da Consellería:

- Presidente/a. O director xeral de Educación, Formación Profesional e Innovación Educativa, ou persoa en quen delegue.
- Unha persoa da Subdirección Xeral de Ordenación e Innovación Educativa e Formación do Profesorado, designada polo director xeral de Educación, Formación Profesional e Innovación Educativa.

Por parte da USC:

- A vicerreitora de Investigación e Innovación.
- A directora Biblioteca Universitaria.

As funcións da comisión serán as seguintes:

- Velar conxuntamente polo correcto funcionamento das actuacións obxecto deste convenio.
- A avaliación das actuacións, unha vez finalizadas.



O réxime xurídico desta comisión será o establecido na Lei 40/2015, do 1 de outubro, de réxime xurídico do sector público, para os órganos colexiados.

Sétima. Protección de datos de carácter persoal

De conformidade co disposto na Lei orgánica 15/1999, do 13 de decembro, de datos de carácter persoal, e no Real decreto 1720/2007, polo que se aproba o Regulamento de desenvolvemento da mencionada lei orgánica, a USC terá acceso a datos de carácter persoal do alumnado de Bacharelato Internacional, que non lle revelará á persoa allea á institución, nin utilizará ou disporá deles dun xeito ou con finalidade distinta á expedición dos carnets de biblioteca.

Oitava. Causas de resolución

Este convenio resolverase polas seguintes causas:

Por incumprimento total ou parcial dalgún dos seus puntos.

Por mutuo acordo das partes.

Polo remate da súa vixencia.

Polo transcurso do tempo estipulado sen que se culminen as actuacións acordadas.

Novena. Normativa aplicable e xurisdición

Este convenio ten carácter administrativo e os seus efectos rexeranse polo establecido nas súas cláusulas, e quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público pola Resolución da Consellería de Economía e Facenda, do 8 de abril de 1991.



Aínda que é un dos excluídos do ámbito de aplicación do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, segundo especifica o seu artigo 4, ao non previsto aplicaráselle os principios recollidos na citada lei, co fin de resolver as dúbidas e omisións que se puidesen presentar.

A xurisdición contencioso administrativa será a competente para dirimir as cuestións que puidesen xurdir da aplicación deste convenio.

Ao estaren as dúas partes conformes co estipulado, asinan tres copias deste convenio.

O conselleiro de Cultura, Educación e Ordenación Universitaria	O reitor da Universidade de Santiago de Compostela
--	--